



## SAOPŠTENJE ZA MEDIJE

### Centar za sigurnosne studije traži konkretne odgovore Odustaju li političari u BiH od NATO-a?

Sarajevo, 11.09.2023. godine

Ni najnovija izjava gospodina Milorada Dodika da Bosna i Hercegovina (BiH) „nikada neće biti dio NATO saveza“ nije naišla na odgovor ni bilo kakav komentar partnera u vlasti na državnom nivou, koji se deklarativno zalažu za euroatlanske integracije. Građani i organizacije civilnog društva, koje se bave vanjskopolitičkim pitanjima, sa zabrinutošću se pitaju da li izostanak reakcije znači i prećutno odobravanje.

Konkretnije, da li Trojka i HNS koalicija neformalno daju saglasnost za odustajanje od članstva u NATO-u? Podsjetimo da je NATO jedina izgledna integracija za BiH u dogledno vrijeme, obzirom na stepen ispunjenosti uslova i status u MAP-u, što je čini ozbiljnim pretendentom za punopravno članstvo u najvećem vojnopoličkom savezu. Jedino članstvo u Alijansi svim građanima BiH može pružiti adekvatne sigurnosne garancije i preduprijeti svakodnevne dileme da li se naši najbliži susjedi naoružavaju zarad odbrambenih ili ofanzivnih ciljeva.

Izostanak medijske reakcije se donekle i može opravdati u datim političkim okolnostima, mada smo svjedoci da se i na znatno benignije stavove oponenata odmah izbacuju salve kontraargumenata. Stoga, u cilju dodatnog pojašnjenja građanima i odgovornog odnosa prema javnosti, tražimo od nadležnih institucija vlasti na državnom nivou odgovore na sljedeća pitanja:

1. Zašto se na posljednje četiri redovne sjednice Vijeća ministara BiH nije raspravljalo o materijalu pod nazivom „Informacija o preporukama NATO-a po dokumentu "Informacija o realizaciji aktivnosti iz Programa reformi BiH 2021 i Programa reformi Bosne i Hercegovine 2022", predlagača Komisije za saradnju sa NATO-om BiH?
2. Radi čega Komisija za saradnju sa NATO-om BiH, kojom rukovodi zamjenik ministra vanjskih poslova gospodin Brkić i kojoj administrativnu podršku pruža MVP, ni nakon tri mjeseca od svoje uspostave nije održala niti jedan sastanak?
3. Kada će Vijeće ministara BiH usvojiti i poslati u NATO sjedište u Briselu dokument „Program reformi za 2023. godinu“, obzirom da se približavamo zadnjem kvartalu tekuće godine?
4. U kojoj mjeri se implementira Sporazum političkih koalicija potpisan između partnera u vlasti na državnom nivou pod nazivom "Smjernice, načela i ciljevi u izvršnoj i zakonodavnoj vlasti za period 2022 – 2026. godine", koji sadrži i dio posvećen euroatlanskim integracijama, odnosno saradnji s NATO-om?

S poštovanjem,

  
dr. sc. Denis Hadžović  
predsjednik Centra za sigurnosne studije

